

Monday, January 30th, 2012

Հայ Քոյրերու Վարժարանի Դեկտեմբեր Ամսուան Միջոցառումները



ԼԻՆՏԱ ԳԱՆՏԻԼԵԱՆ

Լոս Անճելըսի Հայ Քոյրերու վարժարանը 2011ի վերջին ամիսը ապրեցաւ հաճելի եռուզեռ մը՝ ընդունելով անակնկալ եւ յարգելի հիւրեր:

* Գանատայի նորընտիր առաջնորդ Միքայէլ եպս. Սուրատեան, Քալիֆորնիա կատարած իր հովուապետական այցելութեան ընթացքին այցելեց նաեւ Հայ Քոյրերու վարժարանը: Երկուշաբթի, Դեկտեմբեր 18ի առաւօտեան, եպիսկոպոսը ժամանեց վարժարանս՝ ընկերակցութեամբ Կլենտէյլի Ս. Գրիգոր Լուսաւորիչ կաթողիկէ եկեղեցոյ ժողովրդապետ Գրիգոր վրդ. Շահինեանի եւ փոխժողովրդապետ Արմենակ վրդ. Պետրոսեանի:

Հիւրը դիմաւորուեցաւ աշակերտութեան, ուսուցչական կազմին, խորհրդատու եւ ծնողաօժանդակ մարմիններու անդամներուն կողմէ:

Սրահի մուտքին, ան օրինեց հայկական տարազ հագուած զոյգ մը աշակերտներու կողմէ ներկայացուած աւանդական հացն ու աղը, ապա սրահէն ներս տեղի ունեցաւ

պաշտօնական ընդունելություն, ուր բարի գալուստի խօսք ուղղեց վարժարանիս տնօրէնուհի քոյր Լուսիա, որ բարի գալուստ մաղթեց գերապայծառին եւ շեշտեց Հայ Քոյրերու վարժարանի առաքելութիւնը՝ ըսելով. «Մեր վարժարանի առաքելութիւնն է թրծել հայ մանուկը Աստուծոյ սիրով եւ մեր նախահայրերուն հաւատքով, ապա ներմուծել անոր մէջ սէրը հայ լեզուին եւ հայ մշակոյթին հանդէպ»:

Ուսուցչական կազմին կողմէ խօսք առաւ հայերէն լեզուի ուսուցչուհի Լինտա Գանտիլեան, որ ողջունելէ ետք հայ վարժարանի սաներէն եղող եպիսկոպոսը՝ աւելցուց. «Ինչպէս որ յատուկ դրոշմ ունի ՀՔ վարժարանին աշակերտելը, նաեւ իրայատկութիւն է հոն դաստիարակ ըլլալը, ուր մանուկը ոչ միայն գիտութիւն կը ստանայ, այլ հոգին կ'ազնուանայ քրիստոնէական ազնուագոյն դաստիարակութեամբ եւ ուսուցիչը իր անձի օրինակովն իսկ կը ձեւաւորէ անոր անհատականութիւնը»: Ապա ան հաւաստիացնելով, որ «պիտի շարունակենք մեր ուղին հաւատարմութեամբ»՝ խօսքը փոխանցեց խնամակալ մարմինի ատենապետուհի Նարիս Խալաթեան-Պեթըլի: Ան նաեւ մեծ ուրախութիւն յայտնեց եպիսկոպոսի այցելութեան առիթով եւ շեշտեց, թէ որպէս խնամակալ մարմինի անդամներ՝ հաւատարմօրէն պիտի շարունակեն ծառայել Հայ Քոյրերու վարժարանին՝ թափ տալու համար այս սուրբ յարկի վերելքին:

Ապա աշակերտութեան խօսքը փոխանցեց Տրդ դասարանէն Փիթըր Տեմիրճեան: Հանդիսութեան մաս կազմեցին երրորդ դասարանէն մինչեւ ութերորդ դասարանի աշակերտներ՝ ներկայացնելով Ս. Ծննդեան երգեր եւ ոտանաւորներ, նաեւ հայրենաշունչ երգեր եւ արտասանութիւններ՝ խանդավառ եւ տօնական ուրախ մթնոլորտ մը յառաջացնելով սրահէն ներս:

Խօսք առաւ առաջնորդ Միքայէլ եպս. Մուրատեան եւ տուաւ իր պատգամը: Ան վերակոչեց իր յիշատակները, որպէս Հայ Քոյրերու վարժարանի աշակերտ, ուր վայելած է խնամքը ինքնամոռաց կոյսերուն:

Ապա, յորդորելով աշակերտները՝ ըսաւ. «Զինուեցէ՛ք ազգային եւ քրիստոնէական զոյգ «թելերով», որպէսզի կարենաք յաջողութեամբ սաւառնիլ հայ ազգի երկնականարին վրայ»:

Պաշտօնական հանդիսութենէ ետք գերապայծառը այցելեց դասարանները եւ մօտէն ծանօթացաւ դպրոցական առօրեային: Միքայէլ եպս. Մուրատեանի օրհնաբեր այցը անմոռանալի օր մը դարձաւ վարժարանի ընտանիքին համար:

* Այս տարի, առաջին անգամ ըլլալով Հայ Քոյրերու վարժարանը երախտագիտութեամբ եւ գնահատանքով ստացաւ «Մարթայեան» կրթաթոշակը, որ իր շրջանաւարտներէն Սիլվա Խազարեան-Մարթայեանի եւ ամուսնոյն Կրէկ Մարթայեանի կողմէ հաստատուած կրթաթոշակ մըն է: Ըստ այս կրթաթոշակի

պայմաններուն՝ միջնակարգի 6-8րդ դասարաններու աշակերտները պետք է շարադրութիւն մը գրեն՝ 500 բառ եւ աւելի գործածելով, առաջարկուած նիւթերու շուրջ, որոնց հիման վրայ կրթաթոշակի պատասխանատուները կ'որոշեն 5 մրցանակակիրներ, որոնցմէ լաւագոյնը կը ստանայ 1000 տոլարի կրթաթոշակ:

Մրցանակաբաշխութիւնը տեղի ունեցաւ Երկուշաբթի, Դեկտեմբեր 19ին, ներկայութեամբ Քալիֆորնիոյ խորհրդարանի անդամ Մայք Կաթոյի, Կրեկ եւ Սիլվա Մարթայեաններու եւ Կլենտլիի ոստիկանութենէն ներկայացուցիչի մը: Ներկայ էին վարժարանիս միջնակարգ բաժնի աշակերտութիւնը, ուսուցչական կազմը, խնամակալ մարմինի անդամներ եւ ծնողներ:

Հանդիսութիւնը ստացաւ պաշտօնական բնոյթ: Աշակերտներու կողմէ ներկայացուեցաւ գեղարուեստական յատուկ յայտագիր, որուն ընթացքին խօսք առին վարժարանիս տնօրէնուհի քոյր Լուսիա եւ խնամակալ մարմինի ատենապետուհի Նարիս Խալաթեան-Պեթըլ: Ապա կրթաթոշակի հիմնադիր Կրեկ Մարթայեան, բեմ բարձրանալով՝ իր կեանքի օրինակով բացատրեց այս կրթաթոշակի նպատակը եւ յորդորեց աշակերտութիւնը զինուելու ուսումով, որպէսզի անվախօրէն նետուին կեանքի ասպարէզ, որ իրենց ընդունելու եւ տեղ տալու պատրաստ է, ապա հրաւիրեց Մայք Կաթօն, որպէսզի մրցանակաբաշխութիւնը կատարէ:

Յարգելի հիւրը, որ յատկապէս այս առիթով կը գտնուէր Լոս Անճելըս, իր ուրախութիւնը եւ երախտագիտութիւնը յայտնեց, իբրեւ կաթողիկէ վարժարանի նախկին սան, եւ յոյս յայտնեց, որ ապագային ներկաներէն շատեր պիտի գտնուին նոյն յարգելի դիրքերու վրայ:

Խանդավառ մթնոլորտի մէջ տեղի ունեցաւ մրցանակաբաշխութիւնը՝ անակնկալի բերելով աշակերտները:

Կը շնորհաւորենք միջնակարգի բոլոր աշակերտները, որոնք անխտիր մասնակցեցան շարադրական մրցումին. նաեւ կը շնորհաւորենք այն աշակերտները, որոնք մրցանակի արժանացան: 8րդ դասարանէն՝ Էմըլի Թելջըր եւ Փիթըր Տեմիրճեան, 7րդ դասարանէն՝ Քրիսթա Քիրքճեան եւ Քրիսթիանա Պեթել եւ 6րդ կարգէն Մեդրի Մարգարեան ստացան «Ապագայի ղեկավարներ» խորագիրով վկայագիրներ, իսկ Փիթըր Տեմիրճեան արժանացաւ բարձրագոյն մրցանակին՝ ստանալով 1000 տոլարի կրթաթոշակ:

Շնորհակալութիւն եւ յաջողութիւն կը մաղթենք Մարթայեաններուն, որոնց մտայղացումը եղող այս ձեռնարկը քաջալերելի էր եւ միաժամանակ՝ ուսանելի:

* Դեկտեմբեր 9 յատուկ թուական մըն է Հայ Քոյրերու վարժարանէն ներս:

Եթե կամաւոր զինուորը կ'երդնու պատերազմի դաշտին վրայ զոհուելով հայրենի հողը պաշտպանել, Անարատ յղութեան միաբանութեան հայ քոյրերը կ'երդնուն իրենց կեանքի առանցքը դարձնել հայ մանուկն ու պատանին, ապա անկէ ետք սերունդներու դաստիարակութիւնը կը դառնայ իրենց մտասելեռումը, իրենց աշխարհը:

Հայ Քոյրերու վարժարանը այս տարի եւս մեծ շուքով տօնեց Անարատ յղութեան միաբանութեան հիմնադրութեան օրը, մասնաւորաբար նշելով վարժարանէս ներս անխոնջ եւ ժիր աշխատող քոյր Գայիանէ Թաւալաքեանի ծառայութեան յիսնամեակը: Դեկտեմբեր 7ի առաւօրեան տեղի ունեցաւ աշակերտական Ս. պատարագ, որուն յաջորդեց աշակերտներու կողմէ յատուկ աղօթքներու եւ մաղթանքներու ընթերցում՝ ուղղուած միաբանութեան բոլոր նուիրեալներուն եւ յատկապէս աշակերտներու սիրելի քոյր Գայիանէին: Ապա տեղի ունեցաւ պատշաճ նախաճաշ՝ կազմակերպուած ուսուցչական կազմի եւ ծնողաօժանդակ մարմինին կողմէ, նաեւ գնահատական նուերներու տուչութիւն վարժարանէս ներս ծառայող քոյրերուն:

Յիշենք, որ մեծարանքի յատուկ արարողութիւն եւ ճաշ կազմակերպուած էր նաեւ Կիրակի, Դեկտեմբեր 4ին, Կլենտլի Ս. Գրիգոր Լուսաւորիչ եկեղեցւոյ մէջ, ուր յաւարտ Ս. պատարագի պարգեւատրուեցաւ քոյր Գայիանէ, ձեռամբ եկեղեցւոյ ժողովրդապետ Գրիգոր վրդ. Շահինեանի:

Կը շնորհաւորենք քոյր Գայիանէ Թաւալաքեանը, իր ծառայութեան յիսնամեակին առիթով:

Նաեւ կը շնորհաւորենք միաբանութեան բոլոր նուիրեալները, կը մաղթենք բոլորին առողջութիւն, յարատեւութիւն եւ կամքի զօրութիւն. կ'աղօթենք բոլոր մեզմէ բաժնուած քոյրերու հոգիներու խաղաղութեան համար եւ կ'աղօթենք, որ Աստուած բազմացնէ նուիրեալներուն թիւը: